



Fasnecht 2010

Sujet :

Proscht -

Mir stosse a

Syt 25 Jahr me glaubts fascht nit
Mache mir en dr Lieschtler Fasnecht mit
Das Jubiläum wei mir richtig fiere
Und s Vergangene nomol lo Revue passiere
Einigi Sujet, wo mir hai beschriebe
Si hüt no aktuell, es isch nit übertriebe

Im 87 hai mir vo dr KB-Chrüzig gseit
Dass es für die eifach keini Ample vertritt
*(Syt dene isch dört jede Tag e riese Puff
S macht d Autofahrer und d Fuessgänger muff)*

Im 88 duet me in Lieschtel drei Pubs ufstelle
Was d Mine vo eusne Beizer gar nit will erhelle
Us em 89 düen mir vo Satelite-Schüssle verzelle
Wo me by eus überall fürs Fernseh duet ufstelle
Im 91 sött d Stadt das 700 Jahr Fescht organisiere
Doch dr Stadroot tuet statt plane lieber diskutiere

1992 isch dr Umweltschutz an erschter Stell
Tempo 80 isch in dr Schwyz sehr aktuell
*(Hüt bisch froh, s goht so schnell neume ane
By dene vile Staus uf euse Autobahne)*

Im 93 will Lieschtel sys Aseh ufpoliere
D Stadt duet e Schubertiade organisiere
E Jahr spöter, d Tour de Suisse isch do
Gehsch dr Stadrot im Renndress umestoh

Im 96, do düen mir vo Werbegondle brychte
Wo d Finanze vo de Waserfallebahne richte
1997 gits in Füllschdorf e kulinarischi Sensation
E wyteri Mc Donalds drive thru food Station

E Johr spöter isch by eus Skulpture-Zyt
Wo s moderni Kunscht zum aluege git
*(Au hütt no weisch in Lieschtel nie genau
Isch das jetzt Kunscht oder bisch uf em Bau)*

In 99 düen mir vo däm Hanflade verzelle
Wo so Säckli mit Gras verchaufe het welle
S Sujet vo 2001 isch: **Ikej au** usenand
Die nordische Möbel bringe jede usser Rand und Band

Im 02 wird by de Lieschtler Beize gmischlet und verschobe
Weisch nie welle Wirt dir Grüezi sait am Obe
Im 03 isch d Expo vorby, was mache mit em Monolith ?
Als Lösing näme mir dä eifach uf em Wage mit

2004 het d WB en Yysebrugg und cha si nümme verwände
S Abrysse choschtet zimmi vill, drumm sueche si Spände
Im 05 kreist überall dä Vogel wo alli kenne
Mir Chnobilis düen dä PLEITEGEIER nenne

2006 hei d Migros und Coop grossi Angscht
Alles nur wäg däm ALDI-Gschpängscht

Im 07 e Frau wo me kennt im Baselland
Als Elsbeth Schneider isch sie bekannt
*(Schneider, Schneider megg, megg, megg
Zum Glück bisch Du jetzt wegg, wegg, wegg)*

D EURO 08 isch s nächste Sujet gsi
Alli Schwyzer hai sich druf gfreut gross und chli
*(Dr Wüetrich git mit em 9. Stadion ganz gross a
Doch fürs finanzielle Debakel duet er kei Geld me ha)*

Im 09 hai mir dänkt anstatt dä Chnoblach z frässe
Düen mir die Chnobi-Zinke eifach zu Öl prässe
*(Dr Gadaffi dä Affi, isch immer no do
Und euse Bundesroot kriecht ihm hinten no)*

Das wärs' aber jetzt düen mir zämme jubiliere
Eifach nur feschte und uf dr Gasse intrigiere
Und Söttisch an dr Fasnecht e Chnoblach-Frässer gse
Denn gratuliersch em, vielleicht tuet er dir e Chnobli geh!